

Morning Regional Dogri News Bulletin, 30th April 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. भारी बरखें करी आए दे चानचक्क हाड़ ते शमानी बिजली पौने आली घटनाएं च 3 नाबालिकें सनें 4 दी मौत ते माल मवेशी दा बी होआ नुक्सान।
2. जम्मू दे डिवीजनल कमीशनर रमेश कुमार होरें श्री अमरनाथ जी दी यात्रा लेई तैआरिएं बारे चर्चा कीती।
3. श्रीनगर पार्लिमान्नी हल्के लेई 24 मेदवार चुनां मैदान च न, 5 मेदवारें नामांकन वापस लैता।
4. कनाडा च प्रधानमंत्री जस्टिन ट्रूडियून हुंदे कार्यक्रम च खालिस्तानी नारे लाने आले मामले गी भारत नै सख्ती नै पुट्टेआ ऐ।

<><><><><><>

Rains & Floods

जम्मू खित्ते दे रामबन, रियासी, किशतवाड़ ते होरने हिस्सें च होई दी बरखा करी 4 लोक जेहदे च त्रै नाबालिक बी शामिल न, दी मौत होई गई ऐ। इस बरखा करी केई सारे घरें ते इमारतें गी नुक्सान पुज्जा ऐ। जम्मू खित्ते दे केई सारे इलाकें च एतवारें थमां गै बरखा पोआ'रदी ऐ, जेहदे चलदे रामबन जिले दी केई सारी थाहरें पर लास-पस्सियां पेई गेदियां हियां। बरखा करी आए दे चानचक्क हाड़ च माल मवेशी दा बी नुक्सान होआ ऐ। ऐतवारें थमां होआ'रदी बरखा करी जम्मू दे केई सारे हिस्सें ते रियासी, रामबन, डोडा ते किशतवाड़ जिले च बी आम जन जीवन पर असर पेआ ऐ। गुलाबगढ़ दे इक ग्रां च 4 तंजला कच्चा मकान लास पस्सियां पौने करी डेई पेआ। माहौर थमां बुद्धल तगर दी शिड़क गड्डिएं दी आओजाई लेई बंद होई गई ऐ। किशतवाड़ जिले च 12 घर, सरकारी स्कूल दी इमारत गी बी नुक्सान पुज्जा ऐ। रामबन जिले च डीसी दफतर रामबन कश 8 परोआरें गी सुरक्षत थाहरे पर मुंतकिल कीता गेआ ऐ की जे उंदे घरें च दरान पेई गई। नौगाम इलाके च चानचक्क हाड़ औने करी 5 घोड़ें मरी गे ते 2 लापता न। सन्नासर च बिजली पौने करी 42 बकरियां ते भिड्ड मरी गेइयां न। डोडा, किशतवाड़, रियासी ते रामबन जिला प्रशासन नै आम लोकें गी हिदायत कीती ऐ जे ओह दरेआए ते पानी आली होरने थाहरें कश नेई जान। मौसम विभाग नै डोडा, रामबन ते किशतवाड़ जिले

लेई ओरेंज अलर्ट जारी कीता ऐ। किशतवाड़ च 12 घरें गी पुज्जे दे नुक्सान दा संज्ञान लेंदे होई केन्द्री मंत्री डॉ. जितेन्द्र सिंह होरें किशतवाड़ दे डिप्टी कमीशनर हुंदे कन्नै गल्ल कीती।

<><><><><><>

Kishtwar Rains

पिछले चऊं दिनें थमां किशतवाड़ च होआ करदी भारी बरखा गी दिक्खदे होई जिला प्रशासन नै आपातकालीन स्थिति च कम्म करने लेई अमल गी हाई अलर्ट पर रौहने लेई आक्खेआ ऐ। मुत्तलका तैहसीलदारें जानकारी दित्ती ऐ जे इस कारण किशतवाड़ नागसेनी ते मुगल मैदान तैहसीलें च तकरीबन कोई 12 घरें गी नुक्सान पुज्जा ऐ। नागसेनी तैहसील च इक कच्चा घर पूरी चाल्ली तबाह होई गेआ जिसलै कि मुगलमैदान तैहसील च 7 पक्के घर ते 2 कच्चे घरें गी नुक्सान पुज्जा ऐ। इआं गै किशतवाड़ तैहसील च इक पक्के घर ते डंगरें गी रखने आले शौड गी मता नुक्सान पुज्जा ऐ जिसलै के इक कच्चा घर ते इक प्राइवेट स्कूलै दी इमारते गी थहोई नुक्सान होआ ऐ। जिला प्रशासन नै डिस्ट्रिक मैजिस्ट्रेट डॉ. देवांश यादव हुंदी निगरानी च सब्बने प्रभावत परोआरें गी सुरक्षत थाहरें पर पजाई दित्ता ऐ ते रैड क्रस दी टीम प्रभावत परोआरें गी राहत समेयान ते जरूरी मदाद देने लेई तनेदही कन्नै कम्म करा'रदी ऐ। आपदा आली इस स्थिति च लोकें गी सौहगा कीता गेआ ऐ जे ओह ऐसी थाहरें पर नेई जान जित्थें नुक्सान होने दी शेंका ऐ। आपदा दी स्थिति च लोक कंट्रोल रूम च राबता करी सकदे न। लोक राबते लेई 01995-259555 जां फही 9484217492 पर कॉल करी सकदे न। एहदे अलावा पुलस कंट्रोल रूम च 9906154100 जां 01995-259193 ते 100 डॉयल करी राबता कीता जाई सकदा ऐ।

<><><><><><>

NH44

रामबन जिले च लगातार बरखा बरने कारण केइएं थाहरें राष्ट्रीय जरनैली शिड़के एनएच44 पर पस्सियां डिग्गी गेइयां न। जेहदे कारण रामबन जिले च शिड़कें पर गडिडएं दी आओजाई बंद ऐ ते लोकें गी जरनैली शिड़कै पर अजें सफर नेई करने लेई सौहगा कीता ऐ। एहदे कन्नै गै बर्फू दे तोदे पौने करी मुगल रोड, भद्रवाह-चंबा रोड बी अजें बंद ऐ। रोजाना सफर करने आले लोकें अग्गें अपील कीती गेई ऐ जे ओह अपना सफर शुरू करने थमां पैहले ट्रैफिक कंट्रोल थमां शिड़कै दी स्थिति बारे जानकारी हासल करी लैन।

<><><><><><>

Shri Amarnath Yatra

जम्मू दे डिवीजनल कमीशनर रमेश कुमार ते एडीजीपी जम्मू जोन आनंद जैन होरें श्री अमरनाथ जी दी यात्रा दी तैआरिएं दे सरबंधै च इक उच्ची सतह दी बैठक लाई। बैठक च आईजीपी ट्रैफिक, डीआईजी सीआरपीएफ,

सैलसफा निदेशक जम्मू, सांबा, कटुआ, उधमपुर ते रामबन दे डिप्टी कमीशनरें हिस्सा लैता। डिवीजनल कमीशनर होरें भगवती नगर, चिचि माता मंदर, रेलवे स्टेशन जम्मू, उधमपुर ते जम्मू हवाई अड्डें ते होरने थाहरें पर पंजीकरण ते आरएफआईडी काउंटर कायम करने दियां हिदायतां दित्तियां। इस दरान यात्रिएं दी सुविधा लेई लंगर, पानी सप्लाई, सेहत दिक्खभाल सरबंधी सुविधा ते होरने इंतजामें पर बी चर्चा होई। जम्मू नगर निगम गी हिदायत कीती गई जे ओह कचरे दे प्रबंधन गी जकीनी बनान। राष्ट्रीय जरनैली शिडक पर यातायात दे प्रबंधन गी सुचारू बनाने लेई बी निर्देश जारी कीते गे।

<><><><><><>

Srinagar Lok Sabha

श्रीनगर पार्लिमानी हल्के दे रिटर्निंग अफसर डॉ. बिलाल-मोही-उद-दीन भट्ट होरें जानकारी दित्ती ऐ जे नां वापस लैने दी खीरी ध्याड़े, 29 वेद्य नामजदगियें थमां 5 मेदवारें अपने नां वापस लेई लैते न। उनें आक्खेआ जे हुन श्रीनगर लोकसभा सीट लेई शड़े 24 वेद्य नामांकित मेदवार मैदान च न। इनें मेदवारें च जम्मू कश्मीर नैशनल कांफ्रेंस दे आगा-सईद रूहूल्ला मेंहदी, पीपी थमां वहीद-उर-रेहमान-पारा, जेएंडके अपनी पार्टी थमां अशरफ मीर, डैमोक्रेटिव प्रोग्रेसिव अजाद पार्टी थमां आमिर अहमद भट्ट ते नैशनल पैथर्स पार्टी थमां हकीकत सिंह शामिल न। इआं गै इस लोकसभा सीट लेई आजाद मेदवारें च शीबन अशाही, नीसार अहमद अहंगी, मिर्जा साजद हुसैन बेग सनें होर मेदवार बी शामिल न।

<><><><><><>

Article 370 Review

सुप्रीम कोर्ट 2019 च केन्द्र सरकार आस्सेआ जम्मू कश्मीर गी दित्ता गेदा विशेष दर्जा हटाने आली दफा 370 गी हटाने दी वैद्वता बारे सुनवाई लेई तैआर ऐ। अदालतै इस मामले दी सुनवाई पैहली मई गी करना तैह कीते दा ऐ। अदालत नै इस मामले गी पिछले ब'रे सुनवाई लेई रखेआ हा। अदालत नै चुनां आयोग गी जम्मू कश्मीर च इस ब'रे सितम्बर म्हीने तगर विधानसभा चुनां करोआने दियां बी हिदायतां दित्ती दियां न।

<><><><><><>

India Khalistan

भारत नै कनेडा च इक सार्वजनिक कार्यक्रम दरान जिसी कनेडा दे प्रधानमंत्री संबोधत करा'रदे हे, च खालिस्तान दे नारे लगने पर तगड़ेयाई कन्नै विरोध कीता गेआ ऐ। इस सिलसिले च विदेश मंत्रालय नै कल नमीं दिल्ली च कनेडा दे डिप्टी हाई कमीशनर होरें गी सम्मन जारी कीता। मंत्रालय नै आक्खेआ जे नेह कार्यक्रमें च बिजन जांच-पड़ताल दे इयै नेही हरकत गी इजाजत देने लेई तगड़ा विरोध दर्ज कराया ते एहदे

उप्पर चिंता बी बुज्झी। मंत्रालय नै आकखेआ जे इयै नेह् कम्म भारत ते कनेडा बश्कार रिश्ते उप्पर शड़ा असर गै नेई पाग सगुआं कनेडा च उंदे अपने शैहरिएं खलाफ हिंसा ते जुर्माना हरकते गी बी बढ़ावा देग।

<><><><><><>

Civil Aviation

सिविल हवाबाजी सरबन्धी मैहकमे दे सचिव मोहम्मद एजाज असद होरें सिविल सचिवालय च इक बैठक दी अध्यक्षता कीती जे जम्मू हवाई अड्डे दे विस्तार आले प्रोजेक्ट दे कम्में दी प्रगति दा जायजा लैता। बैठक दरान सरबन्धी बक्ख-बक्ख पैहलुएं जियां पशुपालन दफ्तर गी मुंतकिल करना, निजी ढांचे गी हटाना, मुआवजा, जिमीं हासल करना जनेह् मामलें पर चर्चा होई। महत्वकांक्षी परियोजना गी सुचारू ढंगै सिर मुकम्मल करने आले कम्में गी जकीनी बनाने लेई सचिव होरें मुत्तलका अफसरें गी आपूं चै नेडमा तालमेल बनाइयै कम्म करने लेई आकखेआ तां जे एह परियोजना समें सिर मुकम्मल होई सकै।

<><><><><><>

DLSA Kathua

एनएएलएसए दे बैनर हेठ जम्मू कश्मीर कनूनी सेवा प्राचीकरण आस्सेआ जारी कार्य योजना तैह्त कठुआ दे एडीआर केन्द्र दे कांफ्रेंस हाल च बैठक लग्गी। इस दरान कनूनी सेवा ते सरबन्धी मदाद आले मामले पर चर्चा होई ते वकीलें गी परामर्श बी दित्ता गेआ। पैनल दे वकीलें गी कमेटी आस्सेआ सलाह दितती गई जे ओह कठुआ दी अदालतें च बकाया कनूनी मामलें दी सुनवाई दरान समें दी पाबंदी बनाई रखन। उनें गी हिदायत कीती गई जे ओह इस बारे रिपोर्ट सरबन्धी दफ्तर गी देन।

<><><><><><>

UGC

इस बारे होने आले यूजीसी-एनईटी दे मतेयान दी तरीक गी अगड़ा पाई दित्ता गेआ ऐ। हुन एह मतेयान 16 जून दे बजाय 18 जून गी लैते जांगन। यूजीसी नै एह फैसला परीक्षाथिएं थमां फीगबैक दी पच्छोकड़े दा लैता ऐ। यूजीसी नै आकखेआ ऐ जे एह मतेयान पूरे मुख्बै च इक्कै ध्याड़े ओएमआर मोड च लैता जाग। यूजीसी-एनईटी दी परीक्षा भारतीय यूनीवर्सिटीएं ते कालजें च असिसटेंट प्रोफेसर ते जूनियर रिसर्च फ़ैलोशिप लेई लैती जंदी ऐ।

<><><><><><>

IPL

आईपीएल क्रिकेट च कल रातीं कोलकाता दे ईडन गार्डन च कोलकाता नाईट राईडर्स नै दिल्ली कैपिटल्स गी 7एं विकटें कन्नै हराई दित्ता। टॉस जित्तिथै पैहले बल्लबाजी करदे होई दिल्ली दी टीमै 20एं ओवरें च 9 विकटें दे नुक्सान पर 153 रंज बनाए जेहूदे परते च कोलकाता दी टीम नै 16 ओवर ते त्रै गेंदें च गै त्रऊं विकटें दे नुक्सान पर 157 रंज बनाइयै मैच जित्ती लैता। अज्ज लखनऊ दे एकाना स्टेडियम च लखनऊ सुपर जायंटस दा मकाबला मुंबई इंडियन्स कन्नै होग।

<><><><><><>